

21. animantibus pereuntibus non et ipsa perit, invisibilis, individua, sic dicta. Hanc viam summam praedicant, quam nacti non amplius revertuntur; haec est mansio mea suprema.
22. GENIUS iste summus vero, Prithae fili, impetrari potest cultu non aliorum spectante, *iste, dico*, cui penitus insunt animantia,
23. a quo Universum hoc expansum. Quo tempore autem ad sortem irrevolubilem, vel revolubilem etiam, vita defuncti proficiscantur: hoc tempus tibi declarabo, Bharatidarum princeps.
24. Ignis, lux, dies, luna crescens, sex menses, quibus sol borealem polum percurrit: horum spatio defuncti adeunt
25. numen mortales numinis gnari. Fumus, nox, similiter luna senescens, sex menses, quibus sol austrinum polum percurrit: horum spatio *defunctus* lunarem splendorem adeptus devotus iterum revertitur.
26. Utrumque hoc iter, candidum et atrum, perpetuum in hoc mundo praedicatur: altero ad sortem irrevolubilem pervenit, altero denuo revolvitur.
27. Binos hosce tramites cognoscens, Prithae fili, haud quisquam devotus perturbatur: quare omnibus temporibus devotioni devotus sis,
28. o Arjuna. Quodcunque libris sacris legendis, sacris facendis, castimoniis largitionibusque virtutis praemium promissum est, id integrum superat devotus isto cognito, et stationem summam ac principem subit.

LECTIO IX.

ALMUM NUMEN loquitur:

1. Nunc vero hanc tibi maxime absconditam effabor haud obtrectanti scientiam universalem cum peculiari coniunctam,
2. quam edoctus a malo liberaberis. Haec est regia disciplina; hoc regium arcanum, idemque lustramen praestantissimum,